

Agor Ysgolion Newydd Diolch I Fuddsoddiad O £70m+



Bydd tair ysgol uwchradd newydd sbon yn agor yn y Sir yr wythnos yma, diolch i fuddsoddiad o fwy na £70 miliwn gan Gyngor Sir Penfro a Llywodraeth Cymru.

Yn agor eu drysau am y tro cyntaf i gannoedd o ddisgyblion mae Ysgol Harri Tudur ym Mhenfro; Ysgol Caer Elen yn Hwlfordd; ac Ysgol yr Eglwys yng Nghymru Penrhyn Dewi yn Nhyddewi.

Mae'r ysgolion yn rhan o raglen fuddsoddi yn Ysgolion yr 21ain Ganrif sy'n cael ei weithredu gan y Cyngor Sir ar y cyd â Llywodraeth Cymru.

Dywedodd Darren Thomas, Rheolwr y Rhaglen a Phennaeth Isadeiledd y Cyngor, ei fod yn hynod falch bod y tri phrosiect mawr wedi cael eu cyflawni'n llwyddiannus.

“Hoffem ddiolch i staff, cyrff llywodraethol a chymunedau lleol y tair ysgol sydd wedi gwneud gwaith aruthrol i sicrhau bod yr ysgolion newydd wedi agor yn brydlon ac o fewn y gyllideb,” meddai.

Adeiladwyd **Ysgol Harri Tudur** o'r newydd yn llwyr ar safle ysgol Bush ym Mhenfro, gyda lle i'r holl ddisgyblion o hen Ysgol Penfro.

Fe gostiodd y prosiect blaenllaw £38.3 miliwn a hwn yw'r prosiect mwyaf erioed a wnaed gan y Cyngor Sir.

Adeiladwyd yr ysgol uwchradd 11-19 gan gwmni adeiladu Bouygues UK ac mae'n darparu addysg i 1,463 o blant a chanolfan awtistiaeth ar gyfer 30 o ddysgwyr.

Nawr bydd gwaith yn dechrau ar ddymchwel hen Ysgol Penfro ac adeiladau hen Ysgol Ramadeg Penfro, gyda'r nod o orffen yr holl waith ar y safle erbyn mis Awst, 2019.

Meddai Fiona Kite, y Pennaeth: "Y llynedd, cynhaliwyd cystadleuaeth gennym ymysg staff a myfyrwyr i greu arwyddair i'n hysgol newydd.

"Mae'r cynnig buddugol, 'Dysgwyr Heddiw, Arweinwyr Yfory' yn ymgorffori nodau Ysgol Harri Tudur i wireddu gallu a breuddwydion yr holl ddisgyblion a myfyrwyr sy'n dysgu gyda ni, boed hynny'n astudiaeth academaidd bellach i Safon Uwch neu fel israddedigion neu i gyflogaeth a hyfforddiant.

"Dim ond dechrau yw adeilad newydd trawiadol yr ysgol ar amser cyffrous i addysg pawb sy'n gweithio ac yn dysgu yn Ysgol Harri Tudur."

Bydd yr ysgol yn agor ei drysau i ddisgyblion ar ddydd Iau, 6ed Medi.

Ysgol Gymraeg £28.1 miliwn newydd sbon yn Hwlfordd yw **Ysgol Caer Elen** i blant 3-16 oed.

Mae'r ysgol yn disodli'r ysgol gynradd Gymraeg flaenorol yn y dref – Ysgol Glan Cleddau – ac mae'n darparu addysg uwchradd Gymraeg i blant 11-16 oed am y tro cyntaf erioed ynghanol y Sir.

Dywedodd Mike Davies, y Pennaeth, ei bod yn amser cyffrous i'r Gymraeg yn Sir Benfro.

"Mae sefydlu Ysgol Caer Elen yn ddathliad o lwyddiant addysg Gymraeg yn y sir. Ein nod yw datblygu ysgol 3-16 arloesol fydd yn cyflwyno addysg Gymraeg o'r ansawdd uchaf mewn partneriaeth â'r ysgolion cynradd sy'n cyflenwi ac Ysgol y Preseli.

"Un o brif gryfderau ein hysgol fydd ei naws ofalgar, agored a hapus lle mae disgyblion yn teimlo'n gartrefol ac yn mwynhau eu haddysg mewn amgylchedd hollol Gymreig.

"Un o'n prif nodau fydd gwneud dysgu'n brofiad cyffrous a dymunol ac rydym yn hyderus y bydd ein disgyblion yn ymfalchïo yn eu hysgol newydd, eu Cymreictod a'u dwyieithrwydd."

Mae Ysgol Caer Elen yn cynnwys darpariaeth uwchradd ar gyfer 600, darpariaeth gynradd ar gyfer 315 a meithrinfa i 45, yn ogystal â Chylch Meithrin i 24.

Darparwyd mynedfeydd ar wahân ar gyfer y gwahanol grwpiau oedran. Bydd addysg Gymraeg ôl-16 yn dal i gael ei ddarparodd yn Ysgol y Preseli yng Nghrymch.

Bydd Wilmott Dixon, y contractwyr, yn dal i weithio ar rai rhannau o'r safle nad oes eu hangen ar y grwpiau blwyddyn presennol tan yr hydref hwyr (fel y cynlluniwyd).

Diwrnod cyntaf tymor newydd yr ysgol yw dydd Iau, 6ed Medi.

Ysgol 3-16 newydd ar gyfer Penmaendewi yw Ysgol yr Eglwys yng Nghymru Penrhyn Dewi, yn gweithredu ar draws tri safle blaenorol Ysgol Dewi Sant, Ysgol Bro Dewi ac Ysgol Gymunedol Solfach.

Penrhyn Dewi fydd ysgol cyfnod uwchradd gyntaf yr Eglwys yng Nghymru i agor ers y 1920au ac ysgol 3-16 gyntaf yr Eglwys.

Buddsoddwyd £4 miliwn ar safle blaenorol Ysgol Dewi Sant mewn adeiladau o'r newydd ac adlunio ystafelloedd dosbarth.

Mae darpariaeth ôl-16 i ddisgyblion ar gael yn y ganolfan chweched dosbarth newydd yn Hwlfordd fel rhan o gydweithio ffurfiol rhwng y Cyngor Sir a Choleg Sir Benfro.

Bydd Penrhyn Dewi'n croesawu ei disgyblion cyntaf ar draws pob un o'r tri safle ar ddydd Iau, 6ed Medi.

Meddai David Haynes, y Pennaeth: "Rwyf wrth fy modd ein bod ar fin agor y drysau i Ysgol Penrhyn Dewi ac rwy'n sicr y bydd y disgyblion yn elwa'n fawr ar y gwelliannau a wnaed i'r adeiladau.

"Hoffwn ddiolch yn bersonol i'r disgyblion hŷn sydd wedi bod yn teithio i Hwlfordd yn ystod y flwyddyn aeth heibio tra gorffennwyd y gwaith, ynghyd â'r rhieni a'r athrawon sydd wedi'u cynorthwyo'n fawr yn ystod y cyfnod hwn.

"Llawer o ddiolch hefyd i WB Griffiths a Chyngor Sir Penfro sydd wedi gweithio'n ddiflino gyda'r corff llywodraethol dros dro er mwyn cyflawni'r prosiect yn brydlon."

Meddai'r Cyngorydd David Lloyd, Aelod Cabinet Cyngor Sir Penfro dros Addysg: "Mae trawsnewid ystâd ysgolion y sir yn dystiolaeth o weledigaeth a phenderfyniad grŵp o swyddogion dan arweiniad y Cyngorydd Jamie Adams, yr Arweinydd blaenorol.

"Mae'r ffaith mai dyma'r Rhaglen Ysgolion yr 21ain Ganrif fwyaf ond un yng Nghymru'n dangos maint y gamp hon.

“Roedd ei mawr angen. Nid oedd yr ysgolion cynradd Fictoraidd a’r ysgolion uwchradd o’r 50au mwyach yn fannau addas i ddysgu ein plant ynddynt.

“Rydym bellach, fodd bynnag, yn gallu cynnig rhai o’r canolfannau addysg gorau yng Nghymru er lles cenedlaethau a ddaw.”

Mae dwy ysgol newydd sbon arall yn dod i fodolaeth hefyd yr wythnos yma.

Mae Ysgol Syr Thomas Picton ac Ysgol WR Tasker Milward yn uno i ffurfio Ysgol Uwchradd WG Hwlfordd, gyda disgyblion yn dal i dderbyn eu haddysg ar y ddau safle am y tro.

Ym mis Gorffennaf, mewn cyfarfod o’r Cyngor llawn, mynegodd aelodau y byddai orau ganddynt adeilad ysgol newydd sbon ar safle Syr Thomas Picton. Bydd y Cyngor nawr yn symud ymlaen i gyflwyno achos busnes dros y datblygiad i Lywodraeth Cymru.

Yr ysgol newydd arall sy’n dechrau’r wythnos yma yw Ysgol Gynradd Gymunedol Aberdaugleddau, fydd yn disodli Ysgol Fabanod y Meads ac Ysgol Plant Iau Aberdaugleddau. Bydd disgyblion yn dal i dderbyn eu haddysg ar y ddau safle.

Geiriad

Ysgol Caer Elen, Hwlfordd